

मार्निंग डोगरी न्यूज़ बुलेटिन, समें. 09-20 Hrs

<><><><><><>

खास-खास खबरें

Headlines

1. लोकसभा दे 7में ते खीरले गेड़ दे चुनां लेई प्रचार जोरें-शोरें जारी ऐ।
2. सरकारै सेना अध्यक्ष, जनरल मनोज पांडे हुंदे कार्यकाल गी इक म्हीना बधाइयै 30 जून तगर करी दित्ता ऐ।
3. श्वदेश मंत्री डॉ. एस.जयशंकर होरें आखेआ ऐ जे भारत दी विदेश नीति दी कामयाबी कन्नै आलमी सतह पर भारत दी प्रतिष्ठा बदली गई ऐ।
4. खेड़डें च दीपा करमाकर नै एशियाई चैंपियनशिप च भारत लेई पैहली बारी सुन्ने दा तगमा जित्तियै इतिहास रची दित्ता ऐ ते आईपीएल क्रिकेट च कोलकाता नाईट राईडर्स नै सनराईजर्स हैदराबाद गी हराइयै खताब अपने नां करी लैता।

<><><><><><>

7th Phase

लोकसभा दे 7में ते खीरले गेड़ दे चुनां लेई प्रचार जोरे-शोरें जारी ऐ। 8 राज्यें ते केन्द्र शासत प्रदेश दिएं 57 संसदी सीटें लेई इस गेड़ तैहत 1 जून गी मतदान होना ऐ। इस गेड़ दे चुनां लेई कुल 904 मेदवार चुनां मैदान च न। इस गेड़ तैहत पंजाब ते उत्तर प्रदेश दिएं 13-13 सीटें, पच्छिम बंगाल दिएं 9 सीटें, बिहार दिएं 8 सीटें, ओडिशा दिएं 6, हिमाचल प्रदेश दिएं 4, झारखंड दी 3 ते केन्द्र शासत प्रदेश चंडीगढ़ दी 1 सीट लेई वोट पाए जाने न। बक्ख-बक्ख सियासी पार्टिं दे वरिष्ठ नेता मतदाताएं गी अपने पक्ख च करने लेई कोई कोर कसर बाकी नेई छोड़ा करदे न। बीजेपी दे राष्ट्री अध्यक्ष जे.पीनड्डा होरें कल इक चुनावी रैली दरान आरजेडी ते कांग्रेस पार्टी दी नुक्ताचीनी कीती। प्रधानमंत्री ते बीजेपी दे वरिष्ठ नेता नरेन्द्र मोदी होरें बी कल उत्तर प्रदेश च चुनावी रैलियां कीतियां। कांग्रेस पार्टी दे प्रधान मल्लिकार्जुन खरगे होरें बीजेपी पर बंड पोआने दी राजनीति करने दा आरोप लाया।

<><><><><><>

PM-Rajouri

प्रधानमंत्री नरेन्द्र मोदी होरें अनंतनाग-राजौरी लोकसभा हल्के च रिकार्ड मतदान होने पर सब्बने मतदाताएं गी ममारकबाद दित्ती ऐ। अपनी इक सोशल मीडिया पोस्ट च मोदी होरें लिखेआ जे लोकें दे इस जोश कन्नै उंदे अंदर लोकतंत्र च बसाह् भरोसे ते लोकतांत्रिक जज्बे दा अस्क साफ लब्बदा ऐ। राजौरी-अनंतनाग लोकसभा सीट पर पिछले 35एं बरें दा रिकार्ड तरोड़दे होई 54.84 फीसद मतदान दर्ज कीता गेआ हा।

<><><><><><>

MCC

चुनां आयोग दे अधिकारिएं केन्द्र शासत प्रदेश जम्मू कश्मीर च आदर्श आचार संहिता लागू होने दे बाद 95 करोड़ रपे मुल्ल दी नगदी, शराब ते होर दुइयां चीजां जब्त कीतियां न। जम्मू कश्मीर च मतदान दी प्रक्रिया जंदे शनिवारें अनंतनाग-राजौरी पार्लिमानी हल्के च चुनां दे कन्नै सम्पन्न होई गई ऐ। कश्मीर दिएं त्रौनें संसदी सीटें पर जित्थें मतदान नै पराने केई रिकार्ड त्रोड़े न, उत्थें गै किश मेदवारें पैसे, शराब ते ताकत दे दम पर मतदाताएं गी प्रभावत करने दियां कोशशां कीतियां। पुलस विभाग नै 90 करोड़ शा मती, औंदन टैक्स मैहकमे नै 42 लक्ख रपे, आबकारी मैहकमे नै 1 करोड़ रपे शा मती ते एनसीबी नै 2 करोड़ 32 लक्ख रपे शा मते दी जब्ती कीती ऐ। एह्दे अलावा 40 सरकारी मलाजमें खलाफ कारवाई बी कीती गई ऐ।

<><><><><><>

Army Chief

सरकारै सेना अध्यक्ष जनरल मनोज पांडे हुंदे कार्यकाल गी इक म्हीने लेई होर बघाई दित्ता ऐ। इस सरबंधे च फ़ैसला मंत्रिमंडल दी नियुक्तिएं सरबंधी कमेटी दी बैठक च लैता गेआ। सेना प्रमुख जनरल मनोज पांडे हुंदे कार्यकाल गी हुन इक म्हीने दी अवधि लेइ बघाइयै 30 जून तगर करी दित्ता गेआ ऐ। जनरल पांडे होर 3 मई गी सेवानिवृत होने आले हे पर हुन उनेंगी इक म्हीने दा सेवा विस्तार दित्ता गेआ ऐ। उनेंगी 30 अप्रैल 2022 गी सेना प्रमुख दे औहदे पर नियुक्त कीता गेआ हा। एह्दे शा पैहले ओह् भारती सेना दे उप-प्रमुख दे तौर पर बी अपनियां सेवां देई चुके दे न।

<><><><><><>

Heat Wave

उपरोतली बधदी जा'रदी गर्मी करी पैदा हालात दी पछझेकड़े च सेहत मंत्रालय नै कम्मकार आली सब्बने थाहरें ते संस्थाने दे मालकें लेई सलाह जारी कीती ऐ जे ओह गर्मी कोला बचाह लेई लोड़चदे हीले करन ते अपने कर्मचारिएं गी मती धुप्यै बाहरले कम्मं पर नेई भेजन। गर्मी कोला बचाह लेई उपाह सांझे करदे होई मंत्रालय नै आखेआ ऐ जे मते जोर आले कम्म जां बाहर भेजने आले कम्म दिने दे ठंडे बेल्ले कराए जान ते इस गल्लै गी जकीनी बनाया जा जे मलाजम शांत, नरोए ते कम्म करने जोग सेहत माहौल कम्म करी सकन। एहदे इलावा मलाजमें लेइ पीने आले पानी सनें होर दुइए सुविधाएं दी बी पक्की बवस्था कीती जा। जारी सलाह च आखेआ गेदा ऐ जे कुसै गी चक्कर, सिर पीड़, तरेली, साह लैने च तकलीफ होने पर केह करना ऐ, एहदा हर कुसै गी पता होना लोड़चदा। मोसम विभाग नै कल उत्तर भारत दे केई इलाकें आस्तै रैड अलर्ट जारी कीता ऐ। जम्मू च कल ब०बद्ध तापमान 42.5 डिग्री सैल्सियस रिकार्ड कीता गेआ हा।

<><><><><><>

Fire Rajouri(byte)

राजौरी जिले दे दलोगरा ते बथूनी ग्राएं दे जंगलें च लग्गी दी अग्ग गी मैहकमा जंगलात नै स्हाली लैता ऐ। मैहकमे दे अधिकारिएं दा आखना ऐ जे गर्मी मती होने कारण जंगलें च अग्ग लगने दी घटना पेश औंदियां न ते लोकें अग्गे अपील कीती ऐ जे जित्थें कुदरै बी अग्ग सुलगै जां फ़ैलन लग्गै तां तुरत मैहकमे गी जानकारी देन। मैहकमे दे इक अधिकारी मोहम्मद शरीफ नै आकाशवाणी कन्नै गल्ल करदे होई आखेआ.....
....बाईट

<><><><><><>

Salary kishtwar

स्कूली शिक्षा निदेशक जम्मू होरें किशतवाड़ जिले च 143 स्कूलें गी मलाजमी दी ऑनलाइन हाजरी लाने आली जे.के.अटैंडेंस ऐप पर दर्ज नेई होने पर सख्त एतराज जतांदे ते संज्ञान लेंदे होई केई संस्थानें दे प्रमुखें ते जैडईओएं समेत केई एचओडीएं दी तनखाह रोकी दित्ती ऐ ते उंदे कोला सरकारी हुक्म दी अनदिक्खी ते खलाफवर्जी लेई जवाब मंगी भेजेआ ऐ।

<><><><><><>

Jai Shankar

विदेश मंत्री डॉ. एस.जयशंकर होरें आखेआ ऐ जे भारत दी प्रतिष्ठा आलमी सतह पर बदली गई ऐ ते भारत दी विदेश नीति दी कामयाबी ओदी धरेलू नीति दी अभिव्यक्ति ऐ। उनें इस गल्लै पर जोर दित्ता जे अज्ज भारत दुनिया दी सब्बने शा तेजी कन्नै बघदी अर्थबवस्था ऐ ते दुनिया इत्थें नमें उद्यम ते कारोबार खोलना चांहदी ऐ। डॉ. जयशंकर होर कल वाराणसी दे बनारस क्लब च आयोजित इक कार्यक्रम दरान बोला करदे होइ जेहदा विशें सार हा—“वैश्विक कूटनीति च भारत दा उदय”। भारत दी विदेश नीति बारे बोलदे होई डॉ. जयशंकर होरें आखेआ जे भारत च पैहले आत्मविश्वास दी कमी ही पर अज्ज भारत हर मुख्य कन्नै नेड़मा तेलमेल बनाइयै अगगे बघै करदा ऐ ते दुनिया च अज्ज भारत दी छवि दे प्रतिष्ठा बदली गेदी ऐ।

<><><><><><>

CBDT

केन्द्रीय परतक्ख टैक्स बोर्ड सीबीडीटी नै लम्मी अवधि आस्तै पूंजी प्राप्ति दी गणना करने आस्तै माली ब'रे 2025 दा लागत मुद्रा स्फीति सूचकांक सीआईआई अधिसूचित करी दित्ता ऐ। माली ब'रे 2024–25 दा सीआईआई 363 रेआ ऐ जेहड़ा आकलन ब'रे 2025–26 आस्तै प्रीावी होग। एह अधिसूचना इक अप्रैल 2025 थमां प्रभावी होग। सीबीडीटी नै आखेआ ऐ जे एह सूचकांक औने आले ब'रे आस्तै बी लागू होग।

<><><><><><>

DC-Jammu

जम्मू दे जिला विकास कमीशनर सचिन कुमार वैश्य होरें कल जिले च बक्ख–बक्ख सेहत इदारें दे कम्मकार दा जायजा लैता ते प्रमुख अस्पतालें च ओपीडी दे कम्म करने ते महत्वपूर्ण कार्यक्रमें जियां जननी सुरक्षा योजना, राष्ट्रीय बाल स्वास्थ्य कार्यक्रम ते राष्ट्रीय टी.बी. नियंत्रण कार्यक्रमें दी अमलावरी दी बी समीक्षा कीती। डीसी होरें सीएमओ ते बीएमओए गी निर्देश दित्ता जे डाक्टरें , नीमडाक्टरी अमले ते होरने मलाजमें दे बेले सिर ड्यूटी पर पुज्जना ते समें कोला पैहले छुट्टी नेई करना जकीनी बनाया जा। तां जे हर इक कम्म बवस्था आले ढंगै सिर चलै ते कुसै गी बी कुसै बी चाल्ली दी कोइ दिक्कत पेश नेई आवै।

<><><><><><>

Katra(byte)

मुख्य दे बक्ख-बक्ख हिस्सें थमां 9 दिव्यांग लोकें कुसुम स्पाइन एंड न्यूरो नां दे एनजीओ दी मदाद कन्ने श्री माता वैष्णो देवी जी दे दरबार च मत्था टेकेआ ऐ। दिव्यांग लोकें गी मान-सम्मान आला जीन जीने च मदाद करने लेई एह गैर-सरकारी संगठन बड़ी महत्वपूर्ण भूमिका नभा करदा ऐ.....बाईट

<><><><><><>

PM-Canner

प्रधानमंत्री नरेन्द्र मोदी होरें आखेआ ऐ जे मुखे गी 77में कॉन फिल्म उत्सव च एतिहासक उपलब्धि हासल करने पर फिल्म निर्माता पायल कपाडिया हुंदे पर मान ऐ। कपाडिया हुंदी फिल्म "ऑल बी इमेजिन एस लाईट" गी इस फिल्मोत्सव च ग्रां प्री पुरस्कार हासल होआ ऐ। मोदी होरें आखेआ इस पुरस्कार कन्नेनां शड़े उंदी विशेष प्रतिभा दा पता लगदा ऐ सगुआं एहदे नै नमीं पीढ़ी दे फिल्म निर्माताएं गी बी प्रेरणा हासल होंदी ऐ।

<><><><><><>

Deepa

दीपा करमाकर होरें उजबेकिस्तान दे ताशकंद एशियन चैंपियनशिप च भारत दा पैहला सुन्ने दा तगमा जित्तिथै इतिहास रची दित्ता। 30 ब'रें दी ओलंपिक खडारन होरें महिलाएं दी पोल-वाल्ट दे फाइनल च 13.566 दे स्कोर गी दर्ज कीती। एह पैहली बारी ऐ जिसलै इक भारतीय जिमनास्टिक नै एशियन चैंपियनशिप दे कुसै बी चरण च सुन्ने दा तगमा जित्तेआ ऐ।

<><><><><><>

IPL

आईपीएल क्रिकेट दे फाइनल मकाबले च कल रातीं कोलकाता नाईट राईडर्स नै सनराईजर्स हैदराबाद गी 6एं विकटें कन्ने हराइथै त्री बारी एह खताब अपने नां कीता ऐ। कोलकाता नाईट राईडर्स नै पैहले गेंदबाजी करदे होई सनराईजर्स हैदराबाद दी पूरी टीम गी 113 रंजें पर गै आउट करी दित्ता। आईपीएल क्रिकेट दे फाइनल मैच दा अजें तोड़ी दा एह सब्बने शा घट्ट स्कोर ऐ। जित्त लेई लोडचदे ममूली 114 रंज दे लक्ष्य दा पिच्छा करदे होई कोलकाता नाईट राईडर्स दी टीम नै अजें 51 गेंदांबाकी रौंहदे गै आईपीएल 2024 दा खताब अपने

नां करी लैता। कोलकाता नाईट राईडर्स लेई वैंकटेश अय्यर नै सब्बने शा मते 52 रंज बनाए जिसलै जे रहमान उल्लाह गुरबाज नै 39 रंजें दा योगदान दित्ता। मिचेल स्टार्क गी मैच दा बेह्तरिन खडारी घोषत कीता गेआ।

<><><><><><>